


TEZAU LITURGIC
24 SEPTEMBRIE

SLUJBA
SF. CUVIOS-
MĂRTURISITOR
LEONTIE
KARPOVICI
DE LA VILNIUS



MOSCOVA, 2000



Служба преподобному Леонтию Виленскому, исповеднику

НА МАЛОЙ ВЕЧЕРНИ

Стихиры на «Господи возвах», глас 8-й:

Се предыде пред узники / и страдальцы за веру
православную / предводитель в терпении,
предшественник в святости, / новый дивный
златоустый учитель и душепопечитель – /
преподобный исповедник Леонтий. / Послужив
бо много со дерзновением опечаленному народу
нашему, / оплот Православия явился // и венец
нетления унаследи.

Отче Леонтие, / велиим христианом уподобился
еси неложно, / с древними истинными
богословами единомыслие обретши // и венец
славы о деяниях с ними восприял еси.

Преподобноисповедниче Леонтие, /
деятельный печальник православнаго народа
показался еси, / темже в Небеснем Царствии //
светло о Господе ликуеши
Благовествуя мир слепотствующим в вере / о
Православии ревностию, / трудолюбием,
молитвою, любовью и милосердием, славный

Леонтие, / воистину явился еси чадо // и наследник Царствия Небеснаго

Слава, глас 5-й:

Благовестуйте пределы Пинския и Виленския
радость велию / – звезда бо новая возжеся над
вами: / восста Леонтий преподобноисповедник
в сонме небеснем / с мучениками литовскими,
Афанасием Берестейским, Андреем и Макарием
Пинскими / и сияет Святей Троице сердцем
верным и чистым / о Любви неизреченной
Божьей вовеки // воспевая Дивнаго во святых
своих.

И ныне, глас той же:

Входа нет. Прокимен дне.

Стихиры на стиховне, глас 1-й:

Отче Леонтие, / кладезю веры предивный, /
любви и милосердия реко, / молися о нас ко
Господу, / да безчувственныя души наша /
оросятся Божией милостию, // по твоим, святе,
молитвам.

*Стих: Праведник, яко финикс, процветёт, / яко
кедр, иже в Ливане, умножится.*

Отче Леонтие, / небо и земля удивися терпению
и служению твоему: / како возможе человек
плотский пожити ангелом подобно, // молися
дароватися нам ревности по Бозе.

*Стих: Насаждéни в дому Господни,/ во дворех
Бога нашего процветут
Пребыл еси неколеблемо,
преподобноисповедниче, / во благовестии и
твердости о Христе и вере православней, /
молися убо, адаманте Света, // о умножении
любви и истины в наших сердцах.*

Слава, глас 8-й:

На крылах нетрудных ума, Бога зрящаго, /
достигл еси, пристанища Небесного / и народ,
духовно израненный, / по правде Евангелия
ходити научил еси, Леонтие, / воздвигув от одра
болезни на путь исцельный // течения к
Небесному с тобою вкупе Пристанищу

И ныне, глас той же:

Не ктому держава смертная возможе держати
человеки / – Христа бо родила Дева чистая, /
поправшаго Смертию смерть всесильне // и
даровавшаго нам радость велию вовеки.

Тропарь, глас 1-й

Земли Пинския прозябение, / края Виленскаго
процветение, / Церкви Православныя
златоустый поборниче и страдальче, / нивы
литовския утешение и украшение / пастырю
добрый, наставниче иноков, / преподобный
исповедниче Леонтие, / моли Христа Бога //
спастися душам нашим.

НА ВЕЛИЦЕЙ ВЕЧЕРНИ

Стихиры на Господи возвах на 8, глас 8-й:

Веселися горо Афонская, / радуйся Уделе
Богоматери! / Се бо инок Руськия земли/
восприя ревность святогорскую / уделом сердце
свое творит Богови / небопарною молитвою
чистаго сердца/ Тому и Небесной Царице
кланяется и усты златыми воспеваает, /
наставляя в вере православней, / собою поучая
попечительному житию // о Небесном Царствии
неистлевающим.

Се предыде пред узники / и страдальцы за веру
православную / предводитель в терпении,
предшественник в святости, / новый дивный
златоустый учитель и душепопечитель – /
преподобный исповедник Леонтий. / Послужив
бо много со дерзновением опечаленному народу
нашему, / оплот Православия явися // и венец
нетления унаследи.

Отче Леонтие, / велиим христианом уподобился
еси неложно, / с древними истинными
богословами единомыслие обретши // и венец
славы о деяниях с ними восприял еси. (Дважды).
Светозарная луча земли наша, / воссия
благодать в подвизах жития твоего, Леонтие, /
молитвы твоя слезныя достигоша Небеси, / дело
же просвещения и Православия утверждения /

освети земли наша, // да не погибнут во отступлении Отческих учений (*Дважды*).

Слава, глас 5-й:

Благовестуйте пределы Пинския и Виленския
радость велию / – звезда бо новая возжеся над
вами: / восста Леонтий преподобноисповедник
в сонме небеснем / с мучениками литовскими,
Афанасием Берестейским, Андреем и Макарием
Пинскими / и сияет Святей Троице сердцем
верным и чистым / о Любви неизреченной
Божьей вовеки // воспеваючи Дивнаго во
святых своих.

И ныне, Догматик, глас той же:

Вход. Прокимен дне. И чтения 3.

*Стихиры, на Литии, глас 1-й,
подобен: «О дивное чудо»:*

О дивное чудо! / Живоносный Православия сад
(/) Пинск и Вильна показываются, / се бо ныне их
чадо возлюбленное, / духовный окормитель и
защититель Православия / торжествует с
Церковью Ликующей. / Тому возопиим вернии, /
веселися убо, отче Леонтие, / престали бо суть
истязания и притеснения, / и лютыя вражия
озлобления // и земля блаженных тобою
наследована есть.

Слава, глас 1-й:

Возрадуйтеся земнороднии, / стекошася бо
ангельския соборы, / приидоша апостольския,
мученическия и преподобных сонмы /
восхвалити небожительнаго Леонтия, / чуднаго
инока, добраго пастыря и честнейшаго
архимандрита, / сей бо взыде ко Престолу
Вышняго молитися / о умножении веры и любви
в земле нашей бедственной, / даровании
мирови мира // и душам нашим велия милости.

И ныне, глас той же:

Тя, Источниче сладчайших животворных вод, /
всеутешная Палато Божия Любви, / не смеем
хвалити, ни о чем просити, грехами
омраченныя, / молитвами же воспевателя
Всечестнаго Успения Твоего / вонми гласу
моления нашего, // да сподобит Сын Твой
христианское успение во спасение нам подати.

Стихиры на стиховне, глас 1 -й:

Отче богомудре, / явился еси свещею, / мрак
невежества, неверия и предательства
разгоняющи, / обители иноческия созидающи и
окормляющи, / благочестие житием своим в
людех возгревающи. // Молися о нас, да не
погибнем, во сени смертней сидящи.

*Стих: Праведник, яко финикс, процветёт, / яко
кедр, иже в Ливане, умножится.*

Пресвитере усерднейший, / каждодневно
Литургию совершавший, / яко Христос
распятый, / образом жития крестным привлекая
к себе, / отовсюду собирал еси кормитися на
пажитях Божиих / овцы словесныя, якоже и Он.
// Молися, да духовным голодом не погибнем.

*Стих: Насаждени в дому Господни, / во дворех
Бога нашего процветут.*

Ныне печатныя листы трудов твоих / пред
Владыкой золотоценными являются, / храмы,
тобою zde устроенныя, там в Чертоги Царския
вменяются. / Многия скорбныя попечения о
братиях / сладчайшим утешением бывают //
Молися, да подражаем тебе в Богоугождении.

Слава, глас 8-й:

Отче любезнейший, / твоими трудами ниву
духовную свою во сто трудов оплодоносил еси, /
пустыню сердец слезами молитв возделал еси, /
и обильно процвете паства / добродетельми
учителя своего, / имеша бо пред собою тя яко
столп, // путеводствующий в Землю Небесную.

И ныне, Богородичен, глас той же:

Не ктому держава смертная возможе держати
человеки / – Христа бо родила Дева чистая, /
поправшаго Смертию смерть всеильне // и
даровавшаго нам радость велию вовеки.

На благословение хлебов:

Тропарь, глас 1-й

Земли Пинския прозябение, / края Виленскаго
процветение, / Церкви Православныя
златоустый поборниче и страдальче, / нивы
литовския утешение и украшение / пастырю
добрый, наставниче иноков, / преподобный
исповедниче Леонтие, / моли Христа Бога //
спастися душам нашим.

НА УТРЕНИ

На Бог Господь: **тропарь** (дважды). **Слава**
и ныне, **Богородичен:**

По 1-м стихословии седален, глас 8-й.

Имже образом желает елень на источницы
водныя, сие упова душа твоя, святе,
насыщатися непрестанно Небесною Трапезою,
любовию бо к Богу снедаема, не смятесе
немощей телесных, послушаний многотрудных,
ни поношений и истязаний лютых.

Слава, глас той же:

Каждодневно Утешение точию в Бозе имея,
горе очи возводил еси, Леонтие, яко агнца
заколениа предал еси себе в руки мучивших,
молися, исповедниче преподобне, да придет
помощь Божия на нас.

И ныне, глас той же:

Стой, мужайся и да крепится сердце твое,
уповай на Господа и на Пречистую Матерь Его.
Мы, убо, ленивые и боязливые, именем точию,
не делом христиане, призовем Божие
милосердие, молитвы Богородицы и
преподобноисповедника Христова, да
изменимся в чада Божии и обрящем живот
вечный.

По 2-м стихословии седален, глас 8-й:

На крылах нетрудных ума, Бога зрящаго, /
достигл еси пристанища Небеснаго / и народ,
духовно израненный, / по правде Евангелия
ходити научил еси, Леонтие, / воздвигув от одра
болезни на путь исцельный // течения к
Небесному с тобою вкупе Пристанищу.

Слава, глас 8-й. Подобен: Премудрости...:

Неизреченныя премудрости Боговидне почерпл
еси богатство тайное, / всем источил еси любви
воды, / из каменных сердец источающия слезы,
/ и Божественне веселящия, / отче Леонтие, /
моли Христа Бога прегрешений оставление
даровати // празднующим любовь святую
память твою.

И ныне, глас той же:

Како престану восхваляти любовь Твою,
Пречистая? / Како не поклонюся долготерпению

Твоему, / озлобляемый греховными сквернами?
/ Не остави мене падшаго, / Кресту Сына
Твоего кланяться / и Твое неоскудное
милосердие непрестанно воспевати сподоби //
молитвами угодника Твоего Леонтия.

По полиелѣи седален, глас 4:

Скорби, изгнания и напасти терпеливно понёс
еси, / еретичныя учения отвергая со
дерзновением, / правило показался еси
Православия, о всех моляся / и всем
неиссякаемый источник любви Божественныя и
утешения быв, / брѣмя Христова лёгкое / на
себе усердно, исповедниче, понесл еси.

Слава, и ныне, глас той же:

Притецем ныне к Матери Господа Вышняго и
вкупе с преподобноисповедником Леонтием
воспоим Заступницу Усердную: за всех бо молит
Сына Своего, Христа Бога нашего, и всем
творит спастися, в державный покров Ея
прибегающим.

Степенна, 1-й антифон 4-го гласа.

Прокимен, глас 4-й «Честна пред Господем...».

Евангелие.

По 50-м псалме стихира, глас 6:

Страдальче о Христе незлобивый /
проповедниче златоустый христианства любви,

/ премудрый руководителю жития братскаго, /
пастырю безстрашный в лихолетие униатское, /
киновийнаго жительствова восстановителю, /
преображения духовнаго учителю и неложный
совершителю, / преподобный исповедниче
Леонтие, / моли Царя Славы, // да соблюдет нас
в мире от дел неправых.

КАНОН

Песнь 1-я

Крест начертав, Моисей / впрямю жезлом
Чермное море пресече, / Израилю пешеходящу;
/ той же обратно фараоновым колесницам, /
ударив, совокупи, / вопреки написав
непобедимое оружие. / Тем Христу поим, Богу
нашему, яко прославися.

Ликуй Пинск, богоспасаемый граде, молитвами
мучеников стоящий, в тебе бо родися, и
возрасте причастник к сему Небожителю
Воинству

Досточудне Леонтие, древняго рода
благочестивых служителей Божиих плодоносная
отрасль, издетска утвердился еси стезями
ходити Божь
ими.

Помощником и Покровителем измлада восприял
еси, отче Леонтие, Царя небожителей и Матерь

Его Пречистую, в пучине земных печалей сиротствуя, скорбями же святым сосродствуя.

Богородичен:

О Мати Пречистая, едина Надежда и Заступление наше, Столпе огненный сущим во мраце греховнем, молитвами всечестнаго исповедника Твоего проведи нас неврежденными чрез мытарства земныя и посмертныя истязания!

Ин канон:

Небесным заступлением венчался еси, архимандрите, об отце лжи и страстей осиротением, избегл бо вражия потопления, молися о нас, да не осиротеем Небесных Селений.

В волнах отступничества не погибл еси, исповедниче Христов, молитвами твоими да подвигнемся соблюдати правды евангельския, бежаще потопления заблуждениями.

Путиводи, о святче Божий, нас к Божественному пристанищу, ты бо явился еси в душе и на теле назнаменованный Крестом Христовым, жезлом проповеди схизматическое море разсекши, ведя христолюбцев к обетованному Царствию Божию.

Богородичен:

Одигитрие Святая, не остави ны, в пути земном непорочными соблюди, ходящими в законе Господнем.

Песнь 3-я

Жезл во образ тайны приемлется, / прозябением бо предразсуждает священника; / неплодящей же прежде Церкви / ныне процвете Древо Креста / в державу и утверждение.

Умножая нескверным житием Божия дарования, утвердися сердце твое, Леонтие, токмо во Господе, видя беззакония окрест над Церковью Православною творимые, отступления и предательства.

Распинался еси душею, отче, видя апостольския заветы попираемыи, церкви православныя разграбленими, веру православную поносиму. Молися ко Господу, да избавит нас сего искушения!

Не хвалился еси, отче, Богом данною премудростию, обаче утвердился еси издетска токмо сораспятием Христу, темже многоплоден явился еси в добродетелех.

Богородичен:

Несть свят, якоже Бог наш – показа бо нам крепкую любовь, Всесилен, явился бо в милости

Богородицею Отроковицею, Ея же молитвами утверди нас в сей Любви, поющих Тя, Единого Подателя добротворения.

Ин канон:

Пред вельможи и владыки, от суда до суда аки злодей, влачим бывал еси, Леонтие, правды ради Евангельския, не отрекшися ея, молися о нас, да не оскудеют и наша сердца правды Божьей.

Был еси, Леонтие, напоен оскорблениями даже до смерти верных Православию чад, темже поучал еси неложно всех – во Христа облечемся токмо подъемши Крест.

Моли убо, отче блаженный, Господа, да подвигнемся, якоже и ты, на всяк час, крестоношением мир просвещати.

Богородичен:

Крест – Хранитель Вселенной и Красота Церкви есть, Ты же, Отроковице, уязвлялася еси сей Тайной Красоты всем житием Твоим и по нем, в державу Любви и утверждение.

Седален:

Яко соприродное ти бысть воздержание, ему же навыкл еси, отче Леонтие. Поведайте нам небо и земле, нощи слезныя и дни покаянныя, яко пречудно сила Божия в немощном телеси

воссия. Молися и ныне, угодниче Христов, да
обрящем милостью Его всепобедныя смирение и
любовь.

Песнь 4-я

Услышах, Господи, / смотрения Твоего таинство,
/ разумех дела Твоя / и прославих Твое
Божество.

Яко же Павел первоверховный апостол, судов
пороги истоптал еси, Леонтие, за правду веры
евангельския, обаче токмо во едином Кресте
обрел еси ю.

Тридесяти летом не исполнившимся ти, два лета
истязаша тя в каменном узилище видимыя и
невидимыя враги Церкви Христовой, обаче не
поклонился еси лукавому и не отреклся еси
Православия.

Лютость заточения твоего и православных
храмов поругание, отступниками творимыя,
возмутиста Небеса, и, яко прах, гореша храмы
их каменныя и Вильна вся, строения же
православных не потерпеша вреда, да
вразумятся безумием омраченныя.

Богородичен:

Таинство Странное виде, ужасающися, иногда
пророк, мы же Тя, Рождшую Невмещаемого

небесы, славим, Дево Богородице, просяще
заступления чающим Христова обновления

Ин канон:

Явился еси, убо, отче, воистину вторым Павлом,
возвещая мир, имущи златыя уста благовестия и
просвещения,

Да просветит Христос и наша души миром и
Светом Богопознания, по твоим, святе,
молитвам, ты бо, исполнившись мира, чистым
сердцем узрел еси Бога.

Немощами телесными и смирением видя
поругание веры отеческия возвещал еси Тайну
любви Христовой Победы, молитвами твоими
причастны да будем и любви, и смирению

Богородичен:

Славим Твое Воплощение, Господи, воспеваем
Сосуд избранный, страшной Тайне
послуживший, да молитвами Ея вовеки
сподобимся воспевати Любви Божество.

Песнь 5-я

О треблаженное Древо, / на немже распяся
Христос, Царь и Господь! / Имже паде древом
прельстивый, / Тобою прельстився, / Богу
пригвоздившуся плотию, / подающему мир
душам нашим.

Плач восприял еси, отче, о Церкви-Матери и о предавших ея чадах, издавши сие творение на прочтение людям, темже беззаконно мучим бывал еси в земляной яме два лета без суда и следствия вольностелюбными согражданами.

Духом кланяясь Воскресению Христову, в узах телесных держим был еси хотящими отлучити тя пасхального ликования, обаче пребыл еси, отче, победитель смерти греховныя, Христу ти присно спребывающу.

Поносим бывал еси, безчещен, от темницы в темницу два лета беззаконно влачим, адскаго моря душегубныя бури терпеливно сносил еси охристовляемою душею, отче Леонтие.

Богородичен:

Твоя, Богоневесто, славы земля исполнися, / и к Себе святых вся лики светло привлече, / мира сладкая оставити сих побеждающи / и получитьи Твоя светлости.

Ин канон:

Блажен ты еси, отче, яко соряспялся еси Христу, и, по слову Павлову, спригвоздившуся житием ко Кресту, вообразися в тебе Бог.

Никто не возможе разлучити тебе Любви Божией и Матери-Церкви Православней – ни истязания, ни оплевания, ни безчиние, молися о

нас, да соблюдет Господь и наша сердца в любви и вере неложно.

Крестоношения заповедь соблюди / ныне со
Безплотными Богу сорадуешься, / молися о нас,
честную и священную память твою
совершающих.

Богородичен:

Положил еси нам крепкую Любовь, Всесильне,
Мать и Деву даровавши, неизреченное бо
Чудо Ею нам явился – Христос Бог, подающий
мир душам вовеки.

Песнь 6-я

Воднаго зверя во утробе / длани Иона
крестовидно распростер, / спасительную
Страсть проображаше яве. / Тем, тридневен
изшед, / премирное Воскресение прописаше /
Плотию пригвожденнаго Христа Бога / и
тридневным Воскресением мир просвещшаго.
Видеша отцы и братия виленския, овимже был
еси предводитель, видеша православныя люди,
тобою духовно питаемыя, от Бреста и Пинска,
Львова и Менска, и вся Вильна – верныя и
неверныя, яко пустынножителем во граде
воссия, добродетельми землю нашу освящая.
Победи в тебе, отче Леонтие, Христова Любовь:
никим бо не гнушался еси, обаче словом любви о
Царствии Божии напойл еси обильно всех,

приходивших от синагог, молельней и костелов тебе послушати.

Вси слушавшии тя услаждашася речами златыми, Леонтие, воскрешающими души из ада насилия, вражды и кровопролития.

Богородичен:

Скиния Златая, Богоотроковице, исполненная смирения, родила еси нам нетленное Сокровище, нетления дарующаго всем богатство, моли Христа Бога, да подъемлем и мы крестоношение во спасение.

Ин канон:

Сораспеншися Христу, сердце преображенное стяжал еси, преподобне, любовь точащее неложно, широкое вельми для немощных, озлобленных, страждущих и заблудших.

Молися, о нас, святче Божий, да престанет наше окаянство сердечное и да восстанем, в бездне греховней лежащи.

Иноче любоподвижный, испроси и нам у Господа веры, да преобразится житие наше истинным благочестием, Христа и Церковь Его прославляющи!

Богородичен:

Мати Божия, Молитвенница к Богу неотступная, молися о нас, да исполнимся любви и веры, присно мир просвещающих, и спасение премирное да улучим Твоими ходатайствы.

Кондак, глас 3-й:

Притецем, людие, к дивному праведнику, / яко пророки за правду гонимому, / в горниле истязаний и болезнований преподобне воспитанному, / проповеднику и защитнику веры любовью, / яко воистину златоустому, / сединами мудрости девство украсившему, / и веру отеческую до смерти неложно соблювшему, / да ходатайствует присно ко Господу / о утверждении Церкви Божия, // и исцелении немощей наших знаемых и незнаемых.

Икос:

Что, убо, принесем Господеви, чим оправдимся, грешнии, Небесное в землю обращаючи, Христа присно распинаючи, невозвратное время, слово и целомудрие расточаючи? Ты же, угодниче Божий, Подвигоположником Христа имеючи, сокровищницу души многоценными сими исполнил еси. Молися за ны убогия, да богатства сия нетленныя обрящем!

Песнь 7-я

Безумное веление / мучителя злочестиваго люди
поколеба, / дышущее прещение и злохуление
богомерзкое, / обаче три отроки не устраши
ярость зверская, / ни огонь снедаяй, / но
противодышущу росоносному Духу, / со огнем
сущу, пояху: / препетый отцев и нас Боже,
благословен еси

Сродником исповеднику Максиму воистину
явился еси, Леонтие! Ибо и твое житие бе
попирающею вражия озлобления песнию: «Боже,
Благословен еси»!

Послушание пастырское обходя со
дерзновением, рукописанием книг и изданием,
златоустными речами ведом был еси
православным и иноверцем во всей Вильни и
Руси, превозносяще Господа житием своим
во веки!

Кии нищии, кии убогии и страждущии в
больницах не видеша лице твое, Леонтие?
Образом был еси добротворения, милосердия и
послушания, творя вся, вверенное ти, и паче
того, со тщанием, Господа славяще житием
своим во веки!

Богородичен:

Песнословим Богоотроковицу Нетленную, яко
Купина бо древле неопальная неврежденна

пребыла есть, Огнь Божественный носящи,
просвещающий сердца и созидающий души!

Ин канон:

Молитвою, благочестием, образом
любоподвижным к Богоугождению был еси,
архимандрите честный, молитвами твоими да
восприимем ревность быти наследниками
Божия Царствия.

Безумныя веления и скорби от сих презирал еси,
Леонтие, любвеобильным преображенным
сердцем, молися о нас, да исполнятся сердца
наша любовью всепобеждающею.

Постыдешася вси во веки, делающии рабу
Твоему, Господи, зло, ибо следовал Леонтий за
Тобою всем сердцем, воздал обильно славу
имени Твоему, в притеснениях и унижениях
делами преподобными благословяще Тя вовеки!

Богородичен:

Величаем возвеличившую Господа и
возрадовавшуюся о Бозе Спасе Своем, чрез Ея
бо смирение родися Христос и Рай нам паки
отверзе.

Песнь 8-я

Благословите, отроцы, / Троицы
равночисленнии, / Содетеля Отца Бога, / пойте

снизшедшее Слово / и огонь в росу претворшее / и превозносите всем жизнь подавающего / Духа Всесвятаго во веки.

Преподобным Леонтием ноши и дни
Вседержителевы воспеваются, огонь, студ и вар
озлоблений попирается, инокам и пастырям
истинный образ благочестия является, сим
Троица Святая превозносится и вовеки
благословляется!

Господа превозносите и пойте и, ибо раб Его
Леонтий безстаршными деяньми покаяния
Лицам Небесным сочтается и непрестанным
причащением Тайн охристовляется, сим Троица
Святая превозносится и вовеки благословляется!

Небо и земля дивятся, дуси и души праведных
ликуют, праведный бо и смиренный Леонтий
посреди вара предательства и вражды,
седмерицею разженных, воспе, неврежденный,
житием песнь Богохвальную во веки!

Троичен:

О, Троице Пресвятая, единосущная и
нераздельная, прими исповедника Твоего о нас
ходатайство, сей бо воспевая Тя делами и
мольбами, истинным отроком Твоим
неизжженным искушениями явися, и в
заточении, и на смертном одре вопия: Боже,
благословен еси!

Ин канон:

Смерть греховная побеждена есть Христом,
слуга же Его Леонтий истинным чадом Его и
наследником бысть. Возликовствуем душами и
умы, Богоподобие таковое зряще!

Душа распятая, измученное житием тело
оставльши, к возжеленному Отечеству взыде с
песнию привычнаго Богославия, Святым Духом
легце возносимая.

Еще в телеси обитаючи, непрестанно молитвою
воспева непрестанно душа твоя, святе, Жизнь
Подающему Богу: «благословен еси, Господи,
пойте, и превозносите Его вовеки»!

Богородичен:

Мати Божия Марие, родила еси Невместимаго
Небесы и возвеличилась еси смирением паче
всех Горних Сил, темже величаем Тя с
Возвеличенным вовеки!

Песнь 9-я

Таин еси, Богородице, рай, / невозделанно
возрастивший Христа, / Имже Крестное
Живоносное на земли насадися Древо; / тем,
ныне возносиму, / покланяющеся ему, Тя
величаем.

Воссия нам паки звезда Божия, николиже
заходившая, обаче много времени сокрытая от

нас, преподобный исповедник Христов Леонтий! Молитвы его да направят души наша в Горний Иерусалим!

Сей пречестный учитель Церковь Виленскую, во благочестии озябшую, возгре, первосажденной Церкви святых обычаи обновив. Частыми евангельскими дождями орошая, сотвори сию ниву Христову урожайну и плодovиту.

Благословен еси, Господи, ибо Твоим смотрением, чрез любовь и терпеливость исповедника Твоего веры православныа благочестие непорочным освидетельствовано быша и в чюжеземных, и в пограничных странах!

Богородичен:

Возрадуемся, земнороднии, и возвеличим в песнях Матерь Света, Рай Тайный, Светоносное Древо, ибо Плод родила еси, Пречистая, неложно насыщающий алчущих и жаждущих, – от века Предвозвещеннаго, Дарующаго, паче Райскаго, нетление.

Ин канон:

Воспойте, обители иноческия, воспойте, храмы Божия, подвизи добродетельнаго Леонтия! Ты же, пастырю добрый, молися, да не погибнем в

непогодах лености, плод достойный Богу приносяще.

Неослабно преображающися душею, любоподвижный инок делом и словом явился еси; молися о нас, да возможно Бог и наша души небесне преобразити!

Честна пред Господем смерть преподобных Его, твоя же кончина, отче, велией печалию братии осиротевшей бысть, воистину честна пред Господем явися, молися о нас, да восприимем честное христианское успение.

Богородичен:

Величай, величай душе моя Божию Матерь, несть бо иной такой Заступницы роду христианскому, по Успении мира не оставившей и всякой просящей душе всемошно помогающей!

Светилен:

Да почтится всехвальный Леонтий, измлада бедами гонимаго Православия насыщенный, овый бо смертью в житии пожелал есть умерети для мира сего и ради овец стада Христова. Темже воистину явился есть зерном пшеницы Христовой, погибшим ради будущих всходов.

Слава и ныне, Богородичен:

Мысленную Скинию, осиявающую страну нашу
Покровом Матерняго заступления, песнями
величаем, яко Светлейшую Горних воинств и
Рай словесный, процветший нетления Цвет.

Стихиры на хвалитех, глас 1-й:

Отче Леонтие, иноков похвало, / крине райсаго
прозябения, / среде терния попрания заветов
апостольских и озлобления / процвел еси
евангельски в чистоте // красоты Божия в себе
показуя и научая им.

Пострадавши всечестно, Леонтие, / явился еси
удобрением добрым / семенам будущих всходов
// иссеченнаго во земном отечестве твоём
Православия.

Отрасле Лозы Христовой плодоносная, /
Небесным Владыкой светло украшенная, /
молися и нам во Христа украситися! / На тебе
убо взираючи, уныние отгонится, / видим бо тя
по голгофском за Христом восхождении // во
Христа преображенным.

Поем, твою, Леонтие, Божественную жизнь / и
славим твоих подвигов плод – / молитвы
исповеднические у Престола Вышняго / и
Православие процветшее в землях наших.

Слава, глас той же :

Восхвалим, братие, нетленную славу /
добродельнаго архимандрита Леонтия! / Сей
бо верою яко зерно горчичное / возрасте в древо
благосеннолиственное, / собрав под сень Матери-
Церкви / не токмо отрожденную им в
православие Вильну, / но и Пинск, и Полоцк, / и
Менск, и Берестье, Львов, и Киев, / и многия
ведомыя и неведомыя обители и души // да вси
единомысленно прославим Бога.

И ныне, Богородичен, глас той же:

Рождество Твое нетленно явися, Смерть
поправши, темже Христа моли, Богородице,
воскресити Его восстанием умерших души
наша.

